

Los ntawm Thawj Tswj Hwm
Henry B. Eyring

Tus Pab Cuam thib lb hauv
Thawj Pawg Thawj Tswj Hwm



Zaj Lus Tim Khawv thiab Kev Hloov Siab Los Ntseeg

Qhov uas yus txais ib zaj lus tim khawv txog qhov tseeb thiab qhov uas yus hloov siab los ntseeg tiag tiag yog ob qho sib txawv. Piv txwv hais tias, tus Thawj Tim Petus ua tim khawv rau tus Cawm Seej hais tias nws paub Yexus yog Vajtswv Leej Tub.

“Yexus nug lawv hais tias, Nej ne, nej ho hais tias kuv yog leej twg?”

“Ximoos Petus teb hais tias, Koj yog tus Mexiyas uas yog Vajtswv tus uas muaj sia nyob tus Tub.

“Yexus teb hais tias, Yauhas tus tub Ximoos, koj hmoov zoo kawg! Tej lus no tsis yog neeg qhia rau koj, tiam sis yog kuv Txiv tus uas nyob saum ntuj ceeb tsheej qhia rau koj” (Mathais 16:15–17).

Tiam sis, thaum Nws qhia Petus, tus Tswv qhia nws thiab peb txog ib txoj kev uas ua rau peb hloov siab los ntseeg tiag tiag thiab ib txoj kev kom kev hloov siab los ntseeg ntawd yuav nyob tas ib sim neej. Tus Cawm Seej hais li no hais tias, “Thaum koj [hloov siab los ntseeg], koj yuav tsum txhawb koj cov kwv tij zog” (Lukas 22:32).

Yexus qhia Petus hais tias yog tias nws yuav xav thiab ua raws li Yexus Khetos ib tug thwj tim uas hloov siab los ntseeg tiag tiag, ces tseem muaj ib qho kev hloov loj heev uas tsis yog ib zaj lus tim khawv xwb. Qhov no yog qhov kev hloov loj uas peb sawv daws xav tau. Tom qab peb

hloov lawm, peb yuav tsum hloov zuj zus mus tom ntej mus txog thaum peb tas sim neej hauv lub ntiaj teb no (saib Amas 5:13–14).

Peb paub ntawm peb tus kheej thiab paub thaum peb saib lwm tus hais tias qhov uas peb muaj hwj chim ntawm sab ntsuj plig ob peb zaug ntshe yuav tsis txaus. Petus hais tias nws tsis paub tus Cawm Seej tom qab nws twb txais ib zaj lus tim khawv los ntawm tus Ntsuj Plig uas qhia hais tias Yexus yog tus Khetos. Peb tug Tim Khawv txog Phau Ntawv Maumoos twb muaj zaj lus tim khawv hais tias Phau Ntawv Maumoos yog Vajtswv txoj lus, tiam sis yav tom ntej lawv raug cuam tshuam tsis kawm txhawb nqa Yauxej Xamiv ua tus Yaj Saub rau tus Tswv lub Koom Txoos.

Peb yuav tsum hloov siab, raws li piav txog nyob hauv phau Amas: “Thiab lawv tau tshaj tawm tag nrho rau cov neeg tib yam—[hais] tias lawv tej siab twb raug hloov lawm; tias lawv tsis muaj lub siab xav ua phem lawm” (Amas 19:33; kuj saib Mauxiyas 5:2).

Tus Tswv qhia peb tias thaum peb hloov siab los ntseeg Nws txoj moo zoo tiag tiag, peb lub siab yuav tig los ntawm kev xav txog peb tus kheej thiab tig mus rau kev xav pab lwm tus kom txhawb nqa lawv thaum lawv ua neej zoo kom muaj txoj sia nyob mus ib txhis. Yog peb xav hloov siab los ntseeg li no, peb yuav tsum thov

Vajtswv thiab muaj kev ntseeg kom ua neeg tshiab los ntawm Yexus Khetos txoj Kev Theej Txhoj.

Peb pib ua li no thaum peb thov Vajtswv kom muaj kev ntseeg txaus hloov siab lees txim txog txoj kev qias dub thiab kom muaj lub txiaj ntsim hlub lwm tus tshaj peb hlub peb tus kheej. Peb yuav thov Vajtswv kom muaj hwj chim tso kev muaj hlob thiab kev ntshaw luag tug tseg.

Peb kuj yuav tsum thov Vajtswv yog tias peb xav txais lub txiaj ntsim uas yog kev nyiam Vajtswv txoj lus thiab Khetos txoj kev hlub (saib Maulaunais 7:47–48). Ob qho no yuav los ua ke. Thaum peb nyeem, xav txog, thiab thov Vajtswv txog Vajtswv txoj lus, peb yuav nyiam heev. Tus Tswv muab qhov no tso rau hauv peb lub siab. Thaum peb hnov txoj kev hlub ntawd, peb yuav pib hlub tus Tswv zuj zus tuaj. Peb kuj yuav hlub lwm tus txaus kom peb txhawb nqa cov uas Vajtswv tso ntawm peb txoj kev.

Piv txwv hais tias, peb yuav thov Vajtswv kom peb paub cov uas tus Tswv xav kom Nws cov tub txib qhia. Cov tub txib yuav muaj kev ntseeg thov Vajtswv kom paub los ntawm tus Ntsuj Plig tias lawv yuav qhia thiab ua tim khawv txog dab tsi. Lawv yuav muaj kev ntseeg thov Vajtswv tias tus Tswv yuav cia txhua tus uas lawv ntsib hnov Nws txoj kev hlub. Cov tub txib yuav tsis muab txhua tus lawv ntsib ua kev cai raus dej thiab muab lub txiaj ntsim Vaj Ntsuj Plig Dawb Huv rau lawv. Tiam sis lawv yuav muaj tus Vaj Ntsuj Plig Dawb Huv ua lawv tus khub. Los ntawm lawv txoj hauj lwm thiab nrog tus Vaj Ntsuj Plig Dawb Huv txoj kev pab, cov tub txib tej siab yuav hloov zuj zus mus.

Lawv thiab peb lub siab yuav rov qab hloov zuj zus thaum peb ua raws li kev ntseeg kom txhawb nqa lwm tus nrog Yexus Khetos txoj moo zoo. Kev hloov siab los ntseeg tsis yog ib qho uas tshwm sim thaum ib lub sij hawm xwb thiab tsis yog ib qho uas yuav nyob ntev npaum li ib lub caij ntawm lub neej no xwb tiam sis yog ib tug txheej txheem uas pheej mus tom ntej tsis tu tsis tseg. Peb lub neej yuav ci kaj zuj zus mus txog hnuv zoo tag nrho, thaum peb yuav pom tus Cawm Seej thiab kawm tias peb twb rais los ua neeg zoo li Nws. Tus Tswv twb piav hais tias yam uas los ntawm Vajtswv los, yog qhov kaj; thiab tus uas txais qhov kaj, thiab ua raws li Vajtswv hais ntxiv mus, txais qhov kaj ntxiv; thiab qhov kaj ntawd yuav ci kaj zus kaj zus mus txog hnuv zoo tag nrho (saib Q&K 50:24).

Kuv cog lus tias peb txhua tus yeej txais tau li no.

QHIA LOS NTAWM TSAB XOY NO

Txwj Laug David A. Bednar ntawm Pawg Kaum Ob tug Thwj Tim tau siv “zaj lus piv txwv txog dib qaub” qhia hais tias kev hloov siab los ntseeg yog ib tug txheej txheem uas pheej mus tom ntej es tsis yog ib qho uas yus ua ib zaug xwb: “Ib kab dhau ib kab thiab ib zaj dhau ib zaj, peb tej kev xav tau, peb tej kev xav, peb cov lus, thiab tej yam peb ua yuav hloov zuj zus kom muaj raws li Vajtswv lub siab nyiam” (“Ye Must Be Born Again,” Liahona, Tsib Hlis Ntuj 2007, 19). Xav saib puas tsim nyog qhia zaj lus piv txwv txog dib qaub rau cov uas koj qhia. Peb yuav ua dab tsi kom mus tom ntej zuj zus raws li tus txheej txheem ntawm kev hloov siab los ntseeg uas Thawj Tswj Hwm Eyring thiab Txwj Laug Bednar hais txog?

TUB HLUAS NTXHAIS HLUAS

Thaum Kuv Hloov Siab

Los ntawm Dante Bairado

Thaum kuv kawm txog Yexus Khetos txoj moo zoo uas raug txum tim rov qab los, kuv tau hnov tus Ntsuj Plig ua tim khawv txog qhov tseeb. Dhau los ntawm kev thov Vajtswv, kuv zaj lus tim khawv haj yam ruaj nrees, thiab kuv txiaj txim siab ua kev cai raus dej.

Tsis ntev tom qab kuv ua kev cai raus dej, tib neeg nyob hauv kuv pawg ntseeg pib nug kuv seb kuv xav li cas txog kev mus ua tub txib. Muaj tseeb tiag, kuv tsis tau paub hais li cas. Ua rau kuv tsis txaus ntseeg qhov uas kuv yuav ncaim kuv tsev neeg thiab tsis kawm ntawv kom mus tau ua tub txib.

Ces muaj ib hnuv kuv pib xav txog kuv txoj kev hloov siab los ntseeg. Kuv nco txog cov tub txib uas tau qhia kuv, ua siab ntev teb kuv tej lus nug thiab pab kuv to taub txoj moo zoo. Kuv paub tias yog tsis muaj lawv txoj kev pab, kuv yeej yuav tsis paub txog lub Koom Txoos tseeb. Thaum kuv xav txog qhov no, ua rau kuv xav pab lwm tus heev. Kuv hnov tus Ntsuj Plig qhia kuv hais tias kuv yuav tsum mus ua tub txib.

Kuv paub tias kev ua cov tub txib txoj hauj lwm yog peb Leej Txiv Saum Ntuj Ceeb Tsheej txoj hauj lwm thiab peb muaj peev xwm pab cov neeg kom paub txog txoj moo zoo uas txum tim rov qab los.

Tus uas sau zaj no nyob hauv Fortaleza, Brazil.

Cia Koj zaj Lus Tim Khawv Ci Ntsa Iab

Txoj kev tau ib zaj lus tim khawv zoo ib yam li kev rauv taws. Ib yam li peb yuav tsum tso taws kom hluav taws kub ntxiv, peb yuav tsum thov Vajtsww, hloov siab lees txim, pab lwm tus, kawm vaj lug kub, thiab ua raws li cov lus txib kom peb zaj lus tim khawv ci ntsa iab.

Yog xav kawm ntxiv txog kev txhawb nqa koj zaj lus tim khawv, cia li nyeem tej nqe vaj lug kub nram qab no. Cia li kos duab txog tsib nplaim hluav taws loj. Plev xim rau ib nplaim thaum koj nyeem ib nqe vaj lug kub. Koj yim nyeem vaj lug kub, hluav taws yim ci zuj zus tuaj—tsis hais koj zaj lus tim khawv thiab!

Mauxiyas 2:17

Amas 5:46

Amas 32:27

3 Nifais 15:10

Yauhas 5:39



Tej Cwj Pwm ntawm Yexus Khetos: Tsis Muaj Kev Txhaum

Ua tib zoo thov Vajtsuv kawm tej yam no thiab nug seb koj yuav tsum qhia dab tsi. Qhov uas koj to taub tus Cawm Seej lub neej thiab tej luag hauj lum yuav ua rau koj txoj kev ntseeg Nus loj tuaj thiab foom koob hmoov li cas rau cov uas koj saib xyuas tom tsev? Kom tau ntaub ntauv xov xwm ntxiv, cia li txuas rau reliefsociety.lds.org.

Kev Ntseeg, Tsev Neeg, Kev Pab

Nov yog ib zaj los ntawm tej zaj cov Mus Saib Xyuas Tom Tsev tsab Xov uas hais txog tus Cawm Seej tej cwj pwm.

Peb tus Cawm Seej, Yexus Khetos, yog tib tug uas muaj peev xwm theej tib neeg lub txhoj. Thawj Tswj Hwm Dieter F. Uchtdorf, tus Pab Cuam thib Ob hauv Thawj Pawg Thawj Tswj Hwm hais tias, “Yexus Khetos, tus Me Nyuam yaj uas tsis muaj qhov ceb, txaus siab muab Nws tus kheej txi ntawm lub thaj thiab them tus nqi rau peb tej kev txhaum.”¹ Qhov uas peb to taub hais tias Yexus Khetos tsis muaj kev txhaum yuav pab peb txoj kev ntseeg Nws loj tuaj thiab pab peb siv zog ua raws li Nws cov lus txib, hloov siab lees txim, thiab ua neeg huv.

Txwj Laug D. Todd Christofferson ntawm Pawg Kaum Ob tug Thwj Tim hais tias “Yexus muaj ib lub cev nqaj daim tawv thiab ib tug ntsuj plig, tiam sis Nws tis ywj rau kev ntxias (saib Mauxiyas 15:5). Peb txaus siab tig mus rau Nws . . . vim Nws yeej to taub. Nws to taub peb tej kev nyiaj ntxeem, thiab Nws kuj paub kov yeej tej kev nyiaj ntxeem thiab. . . .

“ . . . Lub hwj chim ntawm Nws txoj Kev Theej Txhoj tshem tau peb

tej kev txhaum mus. Thaum peb hloov siab lees txim, Nws txoj kev tshav ntuj ua rau peb tsis muaj txim thiab ntxuav peb kom huv (saib 3 Nifais 27:16–20). Peb yuav nyob zoo li peb tsis tau ua txhaum, zoo li peb tsis tau ywj rau kev ntxias.

“Thaum peb siv zog ua raws li Yexus Khetos qhia txhua hnuv thiab txhua lub lim tiam, peb tus ntsuj plig muaj zog tuaj thiab kov yeej, thiab kev ntxias tsis tsim txom ntxiv.”²

Vaj Lug Kub Ntxiv

Mathais 5:48; Yauhas 8:7; Henplais 4:15; 2 Nifais 2:5–6

Los ntawm cov Vaj Lug Kub

Tus Cawm Seej tau them nqi rau peb tej kev txhaum dhau los ntawm qhov uas Nws yog Vajtsuv Leej Tub, Nws lub neej uas tsis muaj kev txhaum, Nws txoj kev raug txom nyem thiab los ntshav nyob hauv lub Vaj Khexemanes, Nws txoj kev tuag saum ntoo khaub lig, thiab Nws txoj Kev Sawv Rov Los. Dhau los ntawm Yexus Khetos txoj Kev Theej Txhoj, peb yuav rov qab ua neeg huv thaum peb hloov siab lees txim.

Tus Vaj Ntxwv Npeyamis qhia nws cov neeg txog Yexus Khetos

txoj Kev Theej Txhoj ces nug lawv seb lawv puas ntseeg nws tej lus. “Lawv sawv daws qw ua ib lub suab hais tias: . . . tus Ntsuj Plig . . . tau ua ib qhov kev pauv loj nyob hauv peb, los sis nyob hauv peb tej siab, xwv kom peb tsis muaj siab xav ua phem ntxiv lawm, tiam sis ua zoo kom tsis tu ncuva mus li. . . .

“Thiab peb txaus siab mus rau ib txog kev sib khi lus nrog peb tus Vajtsuv los ua li nws siab nyiam, thiab ua raws li nws tej lus txib nyob hauv ib puas yam tsav” (Mauxiyas 5:1–2, 5).

Peb kuj muaj tau “ib qho kev pauv loj” zoo li tus Vaj Ntxwv Npeyamis cov neeg, uas “tsis muaj siab xav ua phem ntxiv lawm, tiam sis [xav] ua zoo kom tsis tu ncuva mus li” (Mauxiyas 5:2).

LUS CIM

1. Dieter F. Uchtdorf, “Koj Ua Tau Tam Sim No!” *Liahona*, Kaum Ib Hlis Ntuj 2013, 56.
2. D. Todd Christofferson, “That They Tsis Hlis Ntuj Be One in Us,” *Liahona*, Kaum Ib Hlis Ntuj 2002, 71.

Xav Txog Qhov No

Qhov uas yus dawb huv thiab kev ua zoo tag nrho sib txawv li cas?